

**Sai:**

Cin daengz bak va hai,  
Raeuz dap daiz ciengq go,  
Cinglienz bouxboux rox,  
Raeuz doq fwen daeuj haenh.

**Mbwk:**

Cin daengz bak va hai,  
Raeuz dap daiz eu fwen,  
Caiq mbouj rox lawz dwen,  
Fwen cinglienz geij coenz.

**Sai:**

Gaxgonq gou lij nyez,  
Cough dingq bouxeq naeuz,  
Gwnzbya duzmaxlaeuq,  
Saeklaeuq rox doek dat.

**Mbwk:**

Gaxgonq gou lij iq,  
Nyi bouxlaux hai sing,  
Meuzgeq rox doek ringj,  
Lingzgeq rox doek dat.

**Sai:**

Miz gwn caiq siengj daenj,  
Miz ngaenz caiq siengj gim,  
Guh vunz miz lai sim,  
Haeuj ninz hix mbouj onj.

**Mbwk:**

Miz gwn naejm aeu daenj,  
Miz ngaenz naejm aeu ranz,  
Guh vunz sim daiq dam,  
Famh saeh ienq mbouj gib.

**Sai:**

Byaj loh mbouj yawj roen,  
Saekngoenz rox daemjndoet,  
Guh saeh naejm deng loek,  
Cij mbouj doekcoih vunz.

**Mbwk:**

Byaj loh mbouj yawj roen,  
Din coeg oen mbouj rox,  
Guh saeh dawz hawj hoz,  
Cij mbouj rox doekcoih.

**Sai:**

Vaiz mouz nywj doek lag,  
Vunz mouz bak doekcoih,  
Guh saeh doiq mbouj doiq,  
Lainoix vunz rox bingz.

**Mbwk:**

Bouxgeq miz vah naeuz,  
Lij noix aeu fagcim,  
Langh mbouj gajj aen sim,  
Geq aeu gim couh nanh.

**Sai:**

Moed dwk daihliengz nduk,  
Byuk dwk va couh byaiz,  
Raeuz mbouj dam cienzaiz,  
Vunzlai bouxboux angq.

**Mbwk:**

Moed dwk faexhung nduk,  
Byuk dwk va couh byaiz,  
Boux mbouj dam cienzaiz,  
Daihdah ndaej vunz haenh.

**Sai:**

Bya lawz mbouj gwn nyaez(mez),  
Sae lawz mbouj gwn namh,  
Vunz guh saeh daiq hamj,  
Damj hung lai vah ciuh.

**Mbwk:**

Bingh iq aeu yw ndei,  
Gvaq sez couh hoj coih,  
Rox byaj roen rox doiq,  
Lainoix mbouj oksaeh.

**Sai:**

Ciuhgonq mbangj bouxdaeuz,  
Sim mbaeu vunz youh soh,  
Vihliux gouq bouxhoj,  
Bohmeh dawz gvaq henz.

**Mbwk:**

Ciuhgonq mbangj bouxdaeuz,  
Mbouj ngah ngaenz dam gim,  
Vihliux guh gwzming,  
Lwgcing hix mbouj goq.

**Sai:**

Ciuhgonq gyoengq hungzinh,  
Ce mingh youq ndawbya,  
Dungx iek gwn raghaz,  
Daraiz lumj loek baenq.

**Mbwk:**

Ciuhgonq gyoengq hungzinh,  
Bin gvaq dat gvaq bya,  
Dungx iek gwn raghaz,  
Caux dienyah hawj raeuz.

**Sai:**

Baihgwnz daihbaq hoenx,  
Gwnzroen vunzdig laeh,  
Mbouj buet hix mbouj ndaej,  
Ngeix gjimaz ngaenzcienz.

**Mbwk:**

Baihgwnz feihgih hoenx,  
Gwnzroen vunzdig laeh,  
Mbouj goq aen ndangdaj,  
Mbouj ngeix ngaenz ngeix cienz.

**Sai:**

Ganbu aeu guh ndei,  
Cosim geiq ndawdungx,  
Song gen seuq lumj rumz,  
Vunzlai bouxboux haenh.

**Mbwk:**

Ganbu aeu guh cingq,  
Cosim geiq ndawdungx,  
Gaej naejm gwn amq hung,  
Cij ndaej vunzlai haenh.

**Sai:**

Dangjyenz aeu daiq ndei,  
Rox aen gveih aen gij,  
Guh saeh baengh fazliz,  
Mbouj Miz bouxlawz lwnh.

**Mbwk:**

Dangjyenz aeu daiqdaez,  
Mbouj ndaej mouz cienzaiz,  
Lauz ngaenzcienz daiq lai,  
Ngoenz dai caj mwngz daengz.

**Sai:**

Raeuz dwg boux ganbu,  
Guh saeh aeu roengzsim,  
Boux dam ngaenz dam gim,  
Mbouj dai sim hix naeuh.

**Mbwk:**

Raeuz dwg boux dangjyenz,  
Gingz gaemxgienz mieng gvaq,  
Bak yied gwn yied ngah,  
Rox dai gaj saek ngoenz.

**Sai:**

Bouxgeq miz vah naeuz,  
Vunz mbouj ndaej mouz lai,  
Vunz dam caiz rox dai,  
Roeg dam gwn rox mued.

**Mbwk:**

Bouxgeq naeuz mbouj loek,  
Goek faex aeu hoh ndei,  
Non gwn mbouj liuhleix,  
Laemx seizlawz mbouj rox.

**Sai:**

Gofaex youq bakgeuq,  
Rox bungz rumzgeujgaeq,  
Youq danvih dangsaeh,  
Bouxbox gyaez daeuj ra.

**Mbwk:**

Gofaex youq bakgeuq,  
Rumzgeujgaeq mbouj lau,  
Raeuz aen ndang mbouj ngaux,  
Mbouj lau laemx roengz namh.

**Sai:**

Go'ngaeux hwnj ndawnamh,  
Mbouj samj(uq) nyap samj(uq) boengz,  
Raeuz guh deng guh loeng,  
Miz cik goengbingz dag.

**Mbwk:**

Go'ngaeux hwnj ndawdaemz,  
Mbouj samj(uq) raemx samj(uq) namh,  
Raeuz aen sim mbouj dam,  
Mbouj rox famh gjimaz.

**Sai:**

Ndaem faex youq bakgeuq,  
Rox deng rumzgeujgaeq,  
Cinglienz guh mbouj ndei,  
Saehsaeh guh mbouj baenz.

**Mbwk:**

Ndaem faex youq bakgeuq,  
Rox deng rumzgeujgaeq,  
Cinglienz guh mbouj ndei,  
Saehsaeh guh swnhleih.

**Sai:**

Bouxdaez aeu cinglienz,  
Mbouj yungh gienz guhsaeh,  
Raemxboq saw raen daej,  
Cij ndaej gwn gvaq ciuh.

**Mbwk:**

Bouxdaez aeu cinglienz,  
Gaem gienz aeu yungh ndei,  
Langh doeng dam sae ngeix,  
Yungzheih famh daihcoih.

**Sai:**

Dang guen vih lwgmaenz(lwgminz),  
De cij baenz bouxdaeuz,  
Dang guen mbouj gyaekgyaeu,  
Dang duzmou ndaw hog.

**Mbwk:**

Dang guen gaenx guh saeh,  
De cij ndaej hwnj hung,  
Dang guen dam coq dungx,  
Vunzlai bouxboux lwnh.

**Sai:**

Cinglienz dwg aen daeng,  
Ciuq daengz gwnz daengz laj,  
Bouxlawz guh lujlaj,  
Byaj rox bag saek ngoenz.

**Mbwk:**

Cinglienz dwg aen daeng,  
Ciuq daengz gwnz daengz laj,  
Bouxlawz mbouj dingq vah,  
Mbouj deng gaj hix gyaeng.

**Sai:**

Mbau liz nye couh nyaeuq,  
Daeuz liz maenz(minz) couh baih,  
Byuk liz namh couh dai,  
Boux dam caiz vah ciuh.

**Mbwk:**

Mod dwk goek faex dai,  
Byuk dwk fai hung doemq,  
Boux dam caiz sim ndaem,  
Laemxhoemj vunz mbouj nyiengh.

**Sai:**

Faex baengh rag cij maj,  
Bya baengh faex cij loeg,  
Vah dangj gangj mbouj loek,  
Goeksim mbouj ndaej lumz.

**Mbwk:**

Cinglienz gangj ok bak,  
Dang cag cuengq doiqnaj,  
Bouxlawz mbouj dingq vah,  
Cug ga caiq cug hoz.

**Sai:**

Guh lienzcwng gensez,  
Rubrex ndei lwgminz,  
Gungcanjdangj cizcing,  
Raeuz youq bingzlele.

**Mbwk:**

Ndaem faex mbouj dok rag,  
Bak go hix mbouj mwn,  
Mbouj guh ndei lenzcwng,  
Gwnz laj mbouj vuenyungz.

**Sai:**

Cinglienz gangj okdaeuj,  
Raeuz gangj sim couh ciuq,  
Vah mbouj dwg gangj riu,  
Ciuq fazliz guh saeh.

**Mbwk:**

Cinglienz gangj ok bak,  
Gag boux sim aeu hengz,  
Yienghawz guh mbouj deng,  
Ceng dauqlaeng vaiqdi.

**Sai:**

Raemxdah miz goek lae,  
Faex hung miz rag ciengx,  
Gungcanjdangj dang biengz,  
Siengj vah mbouj gvaq ciuh.

**Mbwk:**

Va gyaeu baengh gaenx ganq,  
Ranz seuq baengh dajleix,  
Lenzcwng gensez ndei,  
Fukheiq daih cienz daih.

**Sai:**

Cinglienz youq ndawsim,  
Lwgminz bouxboux angq,  
Guhdoih byaj siujgangh,  
Riu angq gvaq ndwenngoenz.

**Mbwk:**

Cinglienz youq ndawsim,  
Lwgminz bouxboux angq,  
Byaj diuzroen siujgangh,  
Angqyangz gvaq ndwenngoenz.